



Жанубий ҚОЗОҒИСТОН

janubiy.kz

1991 йил 5 апрелдан чиқа бошлаган
Сешанба, пайшанба ва шанба кунлари чиқади

2026 йил 5 февраль, пайшанба, №13 (3659).



>>> Президент

МИЛЛИЙ МАТБУОТНИНГ ҲИССАСИ ЗАЛВОРЛИ

**ҚАСИМ-ЖҰМАРТ ТҰҚАЕВ ЖУРНАЛИСТЛАРНИ МИЛЛИЙ
МАТБУОТ КУНИ БИЛАН ТАБРИКЛАДИ**

Kazinform. Давлат раҳбари Қасим-Жўмарт Тўқаев оммавий ахборот воситалари Адолатли Қозоғистонни барпо этиш, шунингдек, «Қонун ва тартибот» тамойилини қарор топтиришда салмоқли ҳисса қўшаётганига эътибор қаратди, дея хабар беради Президентнинг матбуот хизмати.

Юртбоши босма нашрлар вакиллари конституциявий ислохотлар, шунингдек, бутун давлат тизimini тубдан янгилашга қаратилган кенг кўламли ўзгаришлар жараёнини ҳолис ва мазмунли ёритишда фаол, амалий иш олиб боришга чақирди.

Қасим-Жўмарт Тўқаев ўз табрик мактубида қайд этганидек, миллатидан ва диний эътиқодидан қатъиназар, барча юртдошларимиз учун энг муҳим вазифа – қонунга ҳурмат, масъулиятли ва бунёдкор ватанпарварлик руҳида мамлакат эгаменлиги ва мустақиллигини асрашдир.

Давлат раҳбари мамлакатимиз журналистлари ушбу ниҳоятда муҳим жараёнда фаол иштирок этишига ишонч билдириб, уларга тинчлик-осойишталик ва ижодий муваффақиятлар тилади.



Ўлжас БЕКТЕНОВ:

ФИТНАНИНГ ОЛДИ ОЛИНИШИ КЕРАК

Бош вазир Ўлжас Бектенов Қозоғистон Республикасининг янги Конституция лойиҳасини аҳолига кенг тарғибот қилиш масаласига оид йиғилиш ўтказди. Тадбирда Ҳукумат аъзолари ва вилоят ҳокимлари иштирок этди.



Primeminister.kz

Бош вазир вазирликлар ва барча даражадаги ҳокимликларга Конституция лойиҳасини фуқароларга кенг тушунтириш юзасидан топшириқлар берди.

Йиғилишда ушбу жараёнда ёлгон маълумотлар ва сохта ахборотларга қарши курашишга алоҳида эътибор қаратилди. Ижтимоий тармоқлар ва мессенжерларда ҳақиқатдан йироқ, фойдаланувчиларни адаштирувчи хабарлар тарқалмоқда.

Ички ишлар вазирлигига бу каби ёлгон маълумотларни тарқатганларни қатъий жазога тортиш вазифаси юклатилди. Бу ишлар «Қонун ва тартибот» тамойилига мувофиқ амалга оширилади.

Йиғилишда мувофиқлаштирувчи – Бош вазир ўринбосари – Маданият ва ахборот вазири Аида Балаева маъруза қилди.

ТУРКИСТОНДАН ЕВРОПАГА ЯНГИ ЙЎЛ

Kazinform. Вилоят ҳокими Нуралхан Кўшеров хорижий сармоядор билан учрашиб, минтақада логистика марказини барпо этиш имкониятларини муҳокама қилди.

Ҳоким вилоят улкан сармоявий ва транзит-логистика салоҳиятига эга эканлигини таъкидлади.

– Туркистон «Ғарбий Европа – Ғарбий Хитой» автомагистрали бўйлаб жойлашган ва халқаро аэропортиимиз ҳам мавжуд. Ушбу имкониятлардан фойдаланиб, товар айлашиш ҳажмларини ошириш мумкин. Биз лойиҳаларни амалга оширишда қўллаб-қувватлашга тайёرمىз, – деди Н. Кўшеров.

Хорижий компания вакиллари маълум қилишича, Туркистон аэропорти орқали Европага 2000 тон-



на товар жўнатилган ва бу кўрсаткични йил давомида янада ошириш режалаштирилмоқда. Шунингдек,

Туркистонни халқаро логистика маркази сифатида тараққий эттиришга қизиқиш билдирилган. Учрашувда Туркистон-

нинг географик жойлашуви ва транзит салоҳиятидан самарали фойдаланиш, транспорт-логистика инфратузилмасини ривожлантириш масалалари ҳам муҳокама қилинди.

Ҳоким вилоят раҳбарияти сармоядорларни ҳар томонлама қўллаб-қувватлашга тайёрилигини ва шу каби йирик лойиҳалар минтақавий иқтисодиёт тараққиётига жўшқинлик бағишлашини таъкидлади.

Учрашув якунида лойиҳа юзасидан аниқ қелишувга эришилди ва ҳамкорликни давом эттиришга қарор қилинди.



ҚОЗОҒИСТОН ФУҚАРОЛАРИНИ ҚАНДАЙ ЎЗГАРИШЛАР КУТМОҚДА?

Kazinform. 1 февралдан эътиборан Қозоғистонда қатор муҳим ўзгаришлар амалга татбиқ этилади. Хусусан, таълим муассасаларида қутилмаганда режадан ташқари текширувлар бошланиб, Миллий жамғармадан болаларнинг ҳисоб-рақамларига маблағлар ўтказилади. Бундан ташқари ёнгин хавфсизлигига қўйиладиган талаблар кучайтирилиб, Қозоғистон фуқаролигини олмоқчи бўлганлар тест топширади.

ТАЪЛИМ МУАССАСАЛАРИ ТЕКШИРИЛАДИ

Ҳукумат раҳбари Ўлжас Бектеновнинг топшириғига мувофиқ, 1 февралдан эътиборан, барча таълим муассасаларида «қутилмаган текширув» тамойили бўйича алоҳида назорат ва кузатув тизими жорий этилди. Бу болаларни соғломлаштириш, уларнинг хавфсизлиги ва овқатланиш масалаларини назорат қилиш имконини беради. Шу муносабат билан Соғлиқни сақлаш, Таълим, Маданият, Меҳнат ва ижтимоий ҳимоя, Туризм ва Ички ишлар вазирликлари маҳаллий ҳокимликлар билан бирга алоҳида назорат ва кузатувга олинадиган иншоотлар рўйхатини тайёрлади.

Мамлакатда 8 мингдан зиёд мактаб мавжуд. Уларда 4,1 миллиондан ортиқ ўқувчи таълим олади. 2025-2026 ўқув йилида 363 461 ўқувчи илк бор таълим муассасасига қадам босди.

МИЛЛИЙ ЖАМҒАРМАДАН БОЛАЛАРГА МАБЛАҒЛАР ЎТКАЗИЛАДИ

Миллий жамғармадан мамлакатдаги 18 ёшга тўлмаган болаларга маблағ ўтказила бошлайди. Маблағ ўтказиш 2024 йилнинг 1 январидан расман ишга туширилган «Миллий жамғарма – болаларга» дастури доирасида амалга оширилади. Дастурда 2006 йилдан бошлаб тутилган ҳар бир болага Миллий жамғармадан ҳар йили маблағ ўтказиш кўзда тутилган.

ЁНГИН ХАВФСИЗЛИГИ ТАЛАБИ КУЧАЙТИРИЛДИ

Республикада фуқаролик муҳофазаси соҳасида янги талаб жорий этилди. Иншоотлар фойдаланишга топширилмасдан аввал уларнинг ёнгин хавфсизлиги талабларига мувофиқлиги текширилади. Бу мажбурият қурилишга буюртма берувчига юкланади ва одамлар кўп тўпландиган ўринларга, шунингдек, баландлиги 28 метрдан ошадиган биноларга, жумладан, кўп қаватли турар жойларга ҳам татбиқ этилади.

Хулоса ваколатли ташкилотнинг ҳудудий бўлинмалари қабул қилинадиган иншоотда ўтказилган ёнгин-техник текширув натижаси бўйича берилади. Уни бериш давлат хизматлари доирасида электрон шаклда «электрон ҳукумат» веб-портали орқали «Е-лицензия» давлат маълумотлар базасининг ахборот тизимида амалга оширилади.

ДАВЛАТ ХАРИДЛАРИДА РАҚАМЛИ ТЕНГЕ ҚўЛЛАНИЛАДИ

2 февралдан эътиборан, давлат харидлари соҳасида қўшилган қиймат солиғи (ҚҚС) белгиланган рақамли тенгени қўллаш синов лойиҳаси ишга туширилади. Шу орқали янги қўшилган қиймат солиғини маъмурий бошқариш дастағи жорий этилиб, рақамли тенгедаги маблағнинг бир қисми ҚҚС қийматига тенг бўлади. У бюджетга солиқ

тўлаш учун ёки бошқа солиқ тўловчилар билан ҳисоб-китоб қилиш учунгина сарфланиши мумкин. Лойиҳа йил охиригача ишлайди.

ҚОЗОҒИСТОН ПАСПОРТИНИ ОЛМОҚЧИ БЎЛГАНЛАР ТЕСТ ТОПШИРАДИ

Ўтган ойда Фан ва олий таълим вазирининг буйруғи билан Қозоғистон Республикаси фуқаролигига қабул қилиш ёки фуқаролигини тиклашда давлат тилини оддий даражада, Конституция асосларини, шунингдек, Қозоғистон тарихини билиш даражасини аниқлаш бўйича тест ўтказиш қоидалари тасдиқланди. Фуқароликка номзодлар учун тестга аризаларни қабул қилиш 3-10 февраль кунлари ўтказилади. Ариза бериш Миллий тест марказининг app.testcenter.kz сайтида ёки УТО иловаси орқали амалга оширилади. Тестнинг ўзи 11 февралда ўтказилади.

Тест 3 бўлимдан иборат:

- қозоқ тили бўйича тест (қозоқ тилида) – 30та топшириқ, ўтиш балли – 15;
- Қозоғистон Республикаси Конституциясининг асослари бўйича тест (қозоқ ёки рус тилида) – 40та топшириқ, ўтиш балли – 20;
- Қозоғистон тарихи бўйича тест (қозоқ ёки рус тилида) – 30та топшириқ, ўтиш балли – 15.
- Ёнғ қўри балл – 100, ўтиш балли – 50. Тест вақти – 2 соат 10 дақиқа. Имконияти чекланган (ногиронлиги бор) шахсларга тест топшириш учун қўшимча 30 дақиқа берилади. Тестда қатнашиш учун 14 693 тенге тўлов амалга оширилади.

ЕВРООСИЁ ИҚТИСОДИЙ ИТТИФОҚИ ҲУДУДИ ОРҚАЛИ ЮК ТАШИШ

1 февралдан эътиборан, Евроосиё иқтисодий иттифоқиға аъзо мамлакатлар ҳудуди орқали ўтадиган юк ташишлар янги усул билан назоратга олинади. Энди икки ёки ундан ортиқ мамлакат орқали ўтадиган товарлар махсус навигацион тамға (пломба)лар орқали кузатилади. Тамғалар юк машиналари ва вагонларга ўрнатилади ва уларнинг ҳаракатини йўл давомида онлайн тарзда кузатиш имконини беради. Тизим аввал автомобиль ва темир йўл транспортда ташилладиган товарларга жорий этилади. У божхона транзити, экспорт ва ЕОИИ мамлакатлари ўртасидаги ўзаро савдо вақтида қўлланилади.

Навигацион пломбани ўрнатиш ва ишга тушириш бор-йўғи 3-5 дақиқани олади, маълумотларни тизимга кириштириш эса 5-7 дақиқада амалга оширилади. Бу юк ҳайдовчилари ва тадбиркорларни қўшимча вақт йўқотишдан ҳимоя қилади.

«Nur Joly» божхона бекатида 2025 йилдан буён ушбу лойиҳа синовдан ўтказиб келинмоқда.

»»» Обуначиларимиз орасида

Саврон тумани Янги Иқон қишлоғидаги энг кўҳна ўқув даргоҳи, 1985 йили қурилиб, фойдаланишга берилган Улуғбек номли мактабга янги директор тайинланди. Бу лавозимга 38 ёшдаги тажрибали устоз Мадияр Бериккули Тасирбаев (тасвирда) лойиқ деб топилди.

УЛУҒБЕК НОМЛИ МАКТАБДА ЯНГИ ДИРЕКТОР

М. Тасирбаев 1988 йили 28 октябрда Қизилўрда вилояти Жанакўрган туманида таваллуд тогган. 1997 йили оиласи билан Янги Иқон қишлоғига кўчиб келди. Улуғбек номли мактабда ўқиди. Туркистон шаҳридаги этнопедагогика коллежи ҳамда А. Яссавий номидаги халқаро қозоқ-турк университетини математика фани устози ихтисоси бўйича тамомлаган. Меҳнат фаолиятини 2009 йили ўзи ўқиган Улуғбек номли мактабда математика ўқитувчиси бўлиб бошлади. Билими, ташкилотчилиқ қобилияти шарофати билан ташкилотчи педагог ҳамда директорнинг ўқув ишлари бўйича ўринбосари бўлиб самарали меҳнат қилди. Ютуқлари туман ва ви-

лоят миқёсида муносиб тақдирланган. Оиласида уч ўғил, икки қиз тарбияламоқда. Бўш вақтида футбол билан шуғулланади. Ушбу ўқув даргоҳида турли йилларда тажрибали раҳбарлар Муҳит Камолов, Аблайхан Қурманбеков, Ўткир Қудретов каби “Жанубий Қозоғистон” газетаси обунасида фаол обуначиларимиз директор бўлиб ишлашди. 2026 йилнинг биринчи ярмига обунани ташкил этиш масаласида қишлоқ УЭМБ раиси Ўсар Нейматуллаев, вилоят оқсоқоллар кенгаши хайъати аъзоси Бобожон хожи Ёқубов, фахрий устоз, ҳар ҳафта газеталарни ҳамқишлоқларига етказиб, ҳолис савобга эга бўлаётган Олим Қосимовлар билан



биргаликда мактабга ташриф буюрганимизда М. Бериккули қабуллаб, кутубхона мудираси Аяжон Исмоилова ҳамда мактаб жамоаси билан ҳамкорликда 50 нусха “Жанубий Қозоғистон” газетаси обунасига ташкилий кўмак кўрсатганлигини миннатдорчилик билан эътироф этамиз. Янги йилни масъулияти мўл янги лавозимда бошлаган директор Мадияр Бериккулига мустаҳкам саломатлик, омад ҳамда устозлар жамоаси билан ҳамкорликда янги зафарларга эришишига тилакдошимиз.

Ш. МАДАЛИЕВ.

ҒАЙРАТ УСТОЗНИ МУБОРАКБОД ЭТИБ

Сўзоқ қишлоғидаги тажрибали устоз Бейсен Талғат Қайбилдаули раҳбарлик қилаётган 1-сонли ҳунар-техника коллежида 37 йилдан буён самарали меҳнат қилаётган Ғайрат Мардон ўғли Валибоев янги йилнинг биринчи ойда олтишининг олтин остонасига қадам қўйди. Камтарин, серғайрат ва тажрибаси мўл устозни самимий муборакбод этамиз.



У 1966 йили 3 январда Сўзоқ қишлоғида дунёга келди. В. И. Ленин номли мактабни битиргач, Сўзоқдаги собиқ 51-сонли техника билим юрти, ҳозирги 1-сонли коллежга ўқишга

кирди. 1984 йили ушбу ўқув даргоҳини муваффақиятли тамомлагач, Совет Армияси сафидаги ҳарбий бурчини адо этишга отланди.

1986 йили Туркистон шаҳридаги индустриал пе-

дагогика техникумига ўқишга кириб, “Техник-механик, ишлаб чиқариш устаси” ихтисоси бўйича битирди. 2004-2007 йилларда Туркистон гуманитар педагогика институтида касб ҳунар-ихтисоси бўйича билим олди. 1989 йилдан то бугунгача – 37 йил бадалида бир пайтлари ўзи ўқиган ўқув даргоҳида махсус фан ўқитувчиси бўлиб самарали меҳнат қилмоқда.

Шу йиллар давомида вилоят таълим бошқармаси, касаба уюшмаси, туман ҳокимияти томонидан ёш авлод тарбияси ҳамда ҳунар таълимида эришган залворли ютуқлари учун кўплаб ташаккурномалар билан муносиб тақдирланди. Унинг шоғирдлари вилоят коллежлари орасида ўтказилган турли мусобақаларда теран билими, ти-



ришқоқлиги боис совринли ўринларни эгаллаб, мукофотларга ноил бўлган.

Оила – муқаддас қўргон. Умр йўлдоши Гулнора Аметова билан Гулжаҳон, Зилола, Сардор, Муниса исмли қобил фарзандлар тарбиялаб, барчасини олий маълумотли этган. Улар турли соҳаларда эл равнақи йўлида хизмат қилмоқда. Бахтли ва аҳил оилада 11 нафар ширин-шакер неваларлар камол топмоқда.

Ш. МАДАЛИЕВ.

Тасвирларда: Ғайрат Мардон ўғли; оила даврасида.

Р.С. Туркистон вилоятининг ибратли фуқаролари – Муҳаммаджон Бобоев раҳбарлик қилаётган туман УЭМБ, коллеж директори ўринбосари Руслан Атажиев, барча ҳамкасблари Ғайрат Мардон ўғли Валибоевни 60 ёш шукронаси ила самимий муборакбод этиб, мустаҳкам саломатлик, саодат ва янги зафарлар тилайди. Таҳририят ҳам шу ҳолис тилаклар ижобатига тилакдош.

»»» Маориф

ЭҲТИРОМ ВА ХОТИРА АЙЁМИ

Сайрам туманининг Манкент қишлоғидаги Иброҳим ота номли мактабда “Эслаб...эслаб...” мавзуида маданий маърифий тадбир ўтди.

Кечада узоқ йиллар таълим соҳасида фидокорона меҳнат қилган, бугун эса нафақада ёки турли таълим муассасаларида фаолият олиб бораётган устозлар эъзозланди. Тадбирни таъкидлаш театр ва кино артисти, Шимкент шаҳар ўзбек драма театри директори вазифасини бажарувчи Рустамхўжа Саидхўжаев олиб борди. У



самимий сўзлари, ўринли ҳазил ва латифалари билан даврага илқ қайфият бағишлади.

Тадбир ташаббускори – мактаб директори Феруза Мурод қизи таълим соҳасига давлат томонидан қаратилётган доимий эътирофни таъкидлаб, устозлар тажрибаси бугунги таълим жараёни учун бебаҳо эканлигини алоҳида қайд этди. У тадбир иштирокчилари – 50 нафар устозга самимий тилакларини изҳор этди.

Тадбирда иштирок этган мактабнинг собиқ директори Музаффар Абдусатторов, шунингдек, Абдуфаттоҳ Сайданов, Саида Жонназарова, Азиза Худойкулова, Ҳабиба Бобонова, Баҳодир Қулаҳмедов каби фахрий устозлар кўрсатилётган эҳтиром ва эътибор учун мактаб раҳбарияти ва жамоага миннатдорчилик билдирдилар.

Бошланғич синф ўқувчилари ижросидаги куй ва рақслар даврага фойиз бағишлади. Тадбир тўқин дастурхон атрофида давом этиб, меҳмонларга мактаб маъмурияти номидан совғалар улашилди.

3. МҮМИНЖОНОВ.

Тасвирларда: тадбирдан лавҳалар.



»»» Обуначиларимиз орасида

“ТАҢ НҲРЫ” ШИФО МАСКАНИГА МИННАТДОРЧИЛИК

Вилоятимизнинг Тулкибош тумани Кемербастау аҳоли манзилида жойлашган, 50 ўринли “Таң нұры” санаториясида Алмати, Шимкент, Саврондан келган юртдошларимиз билан мириқиб, ҳордиқ чиқариб, даволандик.

Қанд диабет, қон босими ва яна кўплаб хасталикларни даволашда тенгги йўқ маскан экан. Тадбиркор Нуржигит Қалмирзаев бунёд этган ушбу шифо масканида олий тоифали кардиолог-шифокор Садиқ Мақсутули, зал мудирди Ануар Мирҳақимов, ҳамширалар Гулназ Сабирали, Перизат Елубек қизи, Гулбадана Сихимбекова ҳамда ўқаловчи Қурманбай Нурғиса каби қўли енгил шифо улашувчи инсонлар саъй-ҳаракатлари ила саломатлигимизни тикладик. Аҳил жамоага минозлар номидан миннатдорчилигимиз мўл.

Мирзахон АДҲАМОВ,
Туркистон вилоятининг
ибратли фуқароси.

Тасвирларда: “Таң нұры” санаториясининг шифокор-ҳамширалари даврасида.



БИЗ СИЗГА ЎХШАЙМИЗ, БОБОЖОН!

Уруш. Бу сўзнинг замирида чексиз алам, изтироб, мангу соғинч мужассам. Унинг жароҳати умрбод азоб беради, нафрат ва қон билан ёзилган ғорик эса хануз ҳўкмрон.

“Ғалаба”га эришилгунча, миллионлаб ҳамюртларимиз ҳалок бўлди. Тирик қолганлари эса элга, ўз яқинлари бағрига қаҳрамон бўлиб қайтдилар.

Ўтган йили Ғалабанинг 80 йиллигини қарши олиш уруш кўрган оталаримизнинг кўпчилигига насиб этмади. Уларнинг сафи кун сайин сийраклашиб, ёшлари 100дан ошган нуронийларимиз орамизда умргузаронлик қилмоқда.

Ҳалол меҳнати билан обрў-эътибор топган, фарзандлари камолини, яқинлари ардоғида яшаб, Ғалаба байрамларини нишонлаш насиб этмаган яна бир камтарин инсон Йўлдошбой Шарифбоевни ёдга оламиз.

1923 йил 5 сентябрда Шимкент шаҳридаги Қўштегирмон даҳасида оддий меҳнаткаш оилада дунёга келган Йўлдошбой ота оғир меҳнатда тобланган ҳақиқий меҳнаткаш инсон эди.

Уруш сўзи ҳар бир хонадонга кирди. Ёш, навқирон йигитлар урушга отланди. 1943 йилда дўстлари ва тенгдошлари қаторида фронтга йўл олган Йўлдошбой ота Биринчи Украина fronti таркибиде жасорат кўрсатди. Жангларнинг бирида оддий аскар оғир яраланди. Госпиталда даволаниб чиққач, яна фронтга йўл олди. Душманининг дайди ўқи танкка қарши артиллерия командири Й. Шарифбоевни ўнг кўзидан яралайди. Фронтдаги қийинчиликларни метин бардоши билан енгган отахон душман қўлига тушиб қолганини шундай хотирларди: “Польша мудофаасида душман қўлига тушдим. Икки қўлим орқада, немис елкамга милтиқ ўқталиб келяпти. Бирон чорасини топиб, қочишни ўйлайман. Бирдан ерга қуладим, орқамдаги немис ҳам устимга қулади ва ўзини эплаб олгунча, қўнжимдаги ханжарни унга ўқталдим. Қутилмаган ҳаракатимдан газанда ура қўнди, ортидан етиб олиб, асирга олдим ва уни қисм командирига топширдим”.

Қадрдон командирнинг совғаси – ханжар уни ўлимдан сақлаб қолди. Ва у бу ханжарни урушдан сўнг уй тўрида сақлади.

Урушга кетгунга қадр математикадан сабоқ берган отахон Ғалабадан сўнг қадрдон юртига қайтди ва яна сеvimли касбини давом эттирди. У нафақат математик, балки ҳарбий таълимдан ҳам дарс берди. Қолаверса, малака ошириш курсларида ўқиб, мол дўхтири касбини ҳам эгаллаб, 7-8 йил ишлади.

Маориф соҳасида кўп йиллар фаолият юритган Йўлдошбой Шарифбоевнинг меҳнатлари таҳсинга сазовор, ҳар қандай улкан мукофотларга лойиқ эди. Аммо ўта камтарин инсон ҳеч қачон ўз меҳнати эътироф этилишини сўрамаган, унинг ҳарбий кийимида “Германия устидан қозонилган Ғалаба учун” ҳамда юбилей медалларигина бор, ҳолос.

Йўлдошбой ота умр йўлдоши Тожой ая билан 4 ўғил ва 3 қизни вояга етказди. Бир ўғли ва уч нафар қизи ота касбини улуғлаб келмоқда.

Сабр-бардош, қатъиятлик, мустаҳкам ирода ва камтаринлик фазилатлари мужассам Йўлдошбой Шарифбоев 1992 йилда вафот этди. Унинг ортидан бебаҳо ҳазина – авлод давомчилари бор. Улар бобоси билан фахрланадилар.

Нурли кунларни армуғон этган ота-боболаримизнинг жасорати бизга доимий ибрат ва сабоқ мактаби бўлиб қолаверади.

Мухтабар ҚАНОАТ қизи.

“Жанубий Қозоғистон” вилоят ижтимоий-сиёсий газетаси таҳририяти фаол жамоатчи муҳбиримиз, фахрий темирйўлчи Эркин Абдунақибовга умр йўлдоши, меҳнат фахрийси Раҳимжон Назархоновага опаси

Марҳабохон МУРОД қизи-нинг вафоти муносабати билан таъзия изҳор қилиб, ҳамдардлик билдиради.

Ўтганларнинг охирати обод бўлсин!

»» Обуначиларимиз орасида

ЯНГИ ИҚОН ҚИШЛОҒИ ОҚСОҚОЛЛАРИ САРДОРИ

Саврон тумани Янги Иқон қишлоғида ҳисобчи ва раҳбар лавозимларида самарали меҳнат қилган кўп йиллик эътиқодли муштарийларимиздан бири Азизхон Абдуғафоров (тасвирда) саксон ёшга тўлди.



А. Абдуғафоров 1946 йили 4 февраль куні деҳқон оиласида таваллуд топган. Мактабдан сўнг Тошкент шаҳридаги ҳисоб-аудит техникумида таҳсил олди. Меҳнат фаолиятини 1963 йили Ангрен шаҳридаги давлат банкида бухгалтер бўлиб бошлади. Ишлаш баробарида Тошкент халқ ҳўжалиги институтини 1969 йили иқтисодчи ихтисоси бўйича сиртдан ўқиб, тамомлади. 1966 йилдан қадрдон қишлоғидаги "Интернационал" жамоа ҳўжалигида ҳисобчи, раис ўринбосари, бош иқтисодчи бўлиб меҳнат қилди. 1988 йили ҳўжалик партия кўмитаси котиби, колхоз раисининг ижтимоий-сиёсий соҳалар бўйича ўринбосари бўлиб



Ботирхон (фан номзоди) шифокор, ўғли Акмал хусусий тадбиркор. Ҳаётини қадрдон замин раўнақида бахшида этиб, айни пайтда Балтабай Жарилқасин раҳбарлик қилаётган Саврон тумани оқсоқоллар ҳайъатига қарашли Янги Иқон қишлоқ оқсоқоллари сардори сифатида жамоат ишларида фаол.

Ш. МАДАЛИЕВ.

Тасвирларда: туман ҳокими М. Танғатаров фахрий фўқаро унвонини тақдим этган онлар; қишлоқ ҳокимлигидаги тадбирда; оила даврасида; шогирдлари билан бирга.

ишлади. 1999-2006 йиллар оралиғида Янги Иқон қишлоқ округи ҳокими лавозимида меҳнат қилди. 2009 йилдан нафақада. Жамоат ишларида фаол. Қишлоқ кенгашида халқ депутати, халқ назорати кўмитаси раиси, Улўбек номли мактабда ота-оналар кўмитаси раиси бўлди. 2012 йилдан Янги Иқон қишлоқ округи оқсоқоллар кенгаши раиси сифатида эл бирлиги, раўнақи, ёшлар тарбияси, давлат сиёсатини тарғиб қилишдек кўламдор ишлар билан банд. Меҳнатлари муносиб баҳоланган. Туман, шаҳар, вилоят ҳокимликлари, ҚР қишлоқ ҳўжалиги вазирлиги, "Дўстлик" ҳамжамиятининг "Ташаккурнома" ва "Мақтов ёрлиқлари" билан, 2004 йил якунига кўра, "Йил одами" ҳамда ҳамқишлоқлари тавсияси ва туман ҳокими Мақсат Танғатаров қарори билан "Саврон туманининг фахрий фўқароси" унвони билан тақдирланган.

Умр йўлдоши Зина Муҳаммаднали қизи билан олий маълумотли қобил фарзандлар тарбиялаб, невар, эваралар кўрган пири бадавлат оила соҳиб. Фарзандлари Зумратой, Ислонбек ўқитувчи, Зулайҳо ва



P.S. Туман ва қишлоқ ЎЗМБ, оқсоқоллар ҳайъати, Янги Иқон қишлоқ округи ҳокими Тоҳир Абдаев, бўлим мудир Бўстон Тожиқддинов, шогирдлари, Улўбек номли мактаб ота-оналар кўмитаси, ҳамқишлоқлари ҳаётини қадрдон замин раўнақида бахшида этган меҳнат фахрийси Азизхон Абдуғафоровни саксон ёш шўқронаси ила муборақбод этиб, мустаҳкам саломатлик, фарзанд, невар, эвара, чеваралар тўйларида бош-қош бўлиш саодатини тилайди.

"Жанубий Қозғоғистон" газетаси таҳририяти ҳам фаол муштарийсига аталган ушбу ҳолис ниятлар ижобатиға тилақдош.

»» Қадрият

Халқимизнинг турмуш даражасини юксалтиришда тадбиркорликни қўллаб-қувватлаш орқали оила фаровонлигини таъминлаш мамлакатимиз сиёсатидаги устувор йўналишларидан бирига айланган. Мустақиллик хотин-қизларимизга ўз иқтидори, салоҳиятини юзага чиқариш, жамиятда ўз ўрнини топиш имкониятини берди. Истиқлолнинг дастлабки йилларида тадбиркорлик туғайли мамлакатимизнинг шу даражада тараққий этишини тасаввур қилиш қийин эди, аммо сўнгги йилларда кичик ва ўрта тадбиркорликни йўлга қўйган юртдошларимизнинг муваффақиятлари бунга далил.

Бугун аёл нафақат меҳрибон она, балки жамиятда фаол иштирокчи ва ташаббускор сифатида ҳам ўзини намоён қилмоқда.

Тадбиркор-чевар Раъно Нажмиддинова @najimiddinova_rano саҳифаси орқали ижтимоий тармоқда фаол.



ИШБИЛАРМОНЛИК, ФИДОЙИ МЕҲНАТ СОҲИБАСИ



Раъно Нажмиддинова 1987 йилда Маҳмуджон ва Муҳаббат Мусаметовлар оиласида туғилган. 21-сонли Чехов мактабида таҳсил олган Раъно ёшлигиданоқ бичиш-тикишга қизиқарди. Шу боис, мактабдан сўнг, "Мерей" касб-хўнар коллежида модельер-дизайнерлик факультетини тамомлади. Турли бичимдаги қўйлақлар тикиб, яқинларига қувонч улаша бошлаган. 2006 йилда Ғуломжон Нажмиддинов билан оила қуради. Фарзандлари Чаросхон, Зоҳиджон, Дилшодбек ва Умиджонларни тарбиялашмоқда. Турмуш ўртоғи Ғуломжон ҳайдовчи, Қозғоғистон-Россия ўртасида юк ташийди.

– **Севган касбингиздан завқ оласизми?**

– Албатта. Айниқса, эзгу ниятлар билан оила қураётган ёшларга фойдадан тегаётганидан хурсанд бўламан. Чўнки азалдан юртимизда қўл меҳнати, асосан, тикувчилик қадрланган. Бувимдан, онамдан ўрганган касбимни ҳаётда давом эттириб, кам бўлмаяман. Айниқса, қайнонам Зоҳида аядан миннатдорман. Миллий ва замонавий матолардан қўрпача, ёстиқ, улар учун жилд, тўшақлар тикамиз. Баъзи харидорлар тайёр маҳсулотни сотиб олишади, айримлар ўз газламаси билан келиб, тикиб беришимизни сўрашади. Ҳар бир ишнинг ўз қийинчилиги, машаққати, молиявий томони бўлади, – дейди чевар келин.

Раъно қайнота ва қайнона билан катта уйда 8 йил бирга яшаган. Қайнонаси нафақага чиққунга қадар тикувчилик фабрикасида меҳнат қилган. Уйда ҳам буюртма асосида қўрпа-қўрпача қавиб сотарди.

Бу Раъно учун айна муддао бўлди. Қайнонасида қўрпачаларга пахта солишни, қавишни ўрганди. Аста-секин бу хўнарнинг сир-асрорларини жуда яхши ўрганди.

– Ойижоним "Тикувчиликда олтин қоида бор: ишингиз пухта ва тоза бўлса, харидорнинг ўзи сизни излаб топади", дерди. Турмуш ўртоғим оилада тўнгич фарзанд бўлгач, янги уйга кўчиб чиқдик. Энди оила тебратиш, турмуш ўртоғимга ёрдам бериш менинг ҳам зиммамда эканлигини яхши билардим. Мустақил иш бошладим, – дейди Раъно.

У кўп йиллик доимий мижозларининг буюртмаларини сидқиқидилдан бажаришга ҳаракат қилади. Қолаверса, у ўз маҳсулотларини ижтимоий тармоқлар орқали реклама қилиб, буюртмалар олади. Замон талабига мос тикувчи бўлиш учун Тошкент шаҳрида маҳорат сабоқларида иштирок этиб, махсус курсларда таҳсил олган. Қўрпа-қўрпача, турли безакдаги ёстиқлардан ташқари, қўл меҳнати билан тайёрланадиган соч тўғноғичлари ва яна кўп буюмлар ясашни ҳам йўлга қўйган.

– Ишда сонга эмас, сифатга эътибор қаратиш кераклигини қайнонам бот-бот тақоррлаб, насиҳат бериб турадилар. Шу боис, ҳар бир

маҳсулотни вақтида пухта ва сифатли тайёрлашга ҳаракат қиламан. Фарзандларимга ҳам шуни ўргатаман. Чўнки маҳсулотларимиздан одамлар кўп йиллар фойдаланади. Шу боис, гигиеник талаблар ҳам мос бўлиши керак.

– **Тадбиркорлик, ишбилармонлик давр талаби, шундайми?**

– Албатта, ҳаётда бирор эзгу максатда амалга ошириш учун инсонда пок ният ва ҳаракат бўлиши шарт. Оилавий тадбиркорлик билан шуғулланган одам кам бўлмайди. Шўнча имконият бўла туриб, меҳнат қилмаслик умрга хиёнат, деб ўйлайман. Ўғил-қизларимиз вояга етмоқда. Уларга яхши таълим-тарбия бериш, қиз узатиш, келин олиш каби ширин орзуларни рўёбга чиқариш учун астойдил меҳнат қилиш керак. Шўнда рўзгор бут, кўнгил хотиржам, оилада фаровонлик ҳўкмрон бўлади.

Дарҳақиқат, аёл табиатан тадбиркор, ишбилармон, ташкилотчи. У мўъжизакор қудратга эга. Чевар-тикувчи Раъно Нажмиддинова фидойи меҳнати билан ўзгаларга ибрат.

Муҳтабар УСМОНОВА.

Қитобхон халқ ҳақида

● Қайсики, халқ китоб ва газета ўқишдан тўхтаеса, у халқнинг онғини сунъий идрок (бошқалар онғи ва маданияти) бошқара бошлайди.

● Халқини китобхонликка қорлаётган ҳокимият халқ қаршисида сўз билан эмас, амалиёт билан гапирарди.

● Китобхон жамиятининг саволлари кўп ёшлари, жавоблари тайёр кексалари, айбини тан оладиган мансабдорлари, ўз она тилини севадириб алла айтадиган оналари бўлади.



● Китоб жамиятининг виждони, китоб ёзадиган ижодкорлар эса, шу юртининг кўзгуларидир.

● Китобхон жамиятда очлик учун эмас, маънавий озуқа учун кураш ҳўкмрон бўлади.

● Халқ китобхонлиқни муҳим эмас, деб ҳисоблар экан, фарзандларини бошқа юрт ҳақиқати ва маданияти бошқаради.

● Энг тезкор ва ижобий ривожланаётган миллат китоб ўқийдиган миллатдир.

Лола ХУШВАҚЗОДА.

Директор – Бош муҳаррир
Райимжон Ортиқбой ўғли
АЛИБОВЕВ.

Бош муҳаррир ўринбосарлари:
Муроджон АБУБАКИРОВ.
Авазхон БУРОНБОВЕВ.

Масъул котиба – Шаҳноза УСМОНОВА.

Масъул шахслар:

Туркистон, Саврон – Шомирза МАДАЛИЕВ. +7701-610-51-22
Қазигурт – Хўршид ҚўЧҚОРОВ. +7701-447-37-42
Сайрам – Зокиржон МўМИНЖОНОВ. +7702-278-96-90
Тулқибош – Мунира САЪДУЛЛАЕВА. +7747-144-60-71
Жетисай, Мақтарал – Муҳтабар УСМОНОВА. +7701-257-36-97
Келес, Саригоч – Малика ЭЛТОЕВА. +7702-841-78-82
Кентов, Сўзоқ – Рўзиохун МАДАЛИЕВ. +7708-824-20-97

Муассис – Туркистон вилояти ҳўкмиллиги.
Мулк эгаси – "Жанубий Қозғоғистон" вилоят ижтимоий-сиёсий газетаси таҳририяти" масъулияти чекланган биродарлиги.

● Мақолалар, эълон ва билдирувлардаги факт ҳамда далилларнинг тўғрилиги учун муаллифлар, реклама ва эълон берувчилар масъулдир.
● Фойдаланилмаган мақолаларга ёзма жавоб қайтаришмайди.

Газета ҚР Маданият ва ахборот вазирлиги томонидан 2020 йил 21 апрелда рўйхатга олинди, КЗ34VPY00022503 гувоҳнома берилган.

"ERNUR-press" МЧБ Ёсмаҳонасида chop этилади.
Шимкент шаҳри, Т. Алимқулов кўчаси, 22.

Қозғоғистон Республикасида тарқатилади.

МАНЗИЛИМИЗ:

160000, Шимкент шаҳри,
Тауке хан шўққўчаси, 49-уй, 3-қават.
Телефон: 78-13-27, +7778-618-39-05.

Электрон почта: janubiy@inbox.ru

Нашр кўрсаткичи – 65466.

Адади – 10600 нуска.

Бўғормас: 239.

Навбатчи муҳаррир: Малика ЭЛТОЕВА.